



Groupe parlementaire

N°237
Entrée le 26.01.2024
Chambre des Députés
Déclarée recevable
Président de la Chambre des Députés
(s.) Claude Wiseler
Luxembourg, le 26.01.2024

Här Claude Wiseler

President vun der Deputéiertechamber

19, um Krautmaart

L-1728 Lëtzebuerg

Lëtzebuerg, de 25. Januar 2024

Här President,

esou wéi d'Chambersreglement et virgesäit, biede mir lech, dës parlamentaresch Fro un d'Madamm Justizminister weiderzeleeden.

Dat neit ASBLs-Gesetz vum 7. August 2023 bréngt fir net gewënnorientéiert Associatiounen eng Rei nei komplex an zäitopwenneg Aufgabe mat sech, dat zum Beispill am Beräich vun der Bereetstellung vun allgemengen Donnéeën awer notamment och am Hiblëck op d'Comptabilitéit, wou och déi meescht Sports- a Kulturveräiner drënner falen, déi nach ëmmer vum Benevolat gedroe ginn.

An deem Zesammenhang géife mir der Madamm Justizminister gär dës Froe stellen:

- 1) Goufen deene Beträffenen Informatiouns- an Ënnerstëtzungsmoosnamen zur Verfügung gestallt? Falls jo, wéi eng? Hunn d'ASBLen duerfir misse bezuelen?
- 2) Kann d'Madamm Minister matdeelen, ob a vu wéi enge Coursen, besonnesch och am Beräich vun der Comptabilitéit, déi betraffe Leit an nächster Zäit kënnen profitéieren? Kann d'Madamm Minister preziséieren, wéi dobäi dem Ëmstand Rechnung gedroe gëtt, datt grad déi Leit déi sech fräiwëlleg an engem Veräin abrénge, dës Formatioune seele während hire regulären Aarbechtsstonne suivéiere kënnen?
- 3) Kann d'Madamm Minister matdeelen, ob déi zäitno Ariichtung vun engem Help Desk fir ASBLe virgesinn ass? Falls net firwat net?
- 4) Kënnen d'ASBLen Finanzhëllef ufroen, fir zousätzlech Personalkäschten déi am Kader vun deenen neie gesetzlechen Obligatiounen entstanen sinn, ze kompenséieren?
- 5) Kann d'Madamm Minister matdeelen, ob grad en vue vum Schutz vum Benevolat méttelfristeg eng Evaluatioun vum Seuil vun 100.000 Euro Aktiva, sou wéi en am Artikel 18, Paragraph 4 vum genannte Gesetz festgeluecht gouf, virgesinn ass, mam Zil dës Limitt eventuell ze erhéijen an och ze indexéieren?

Mat déiwem Respekt,

Alexandra Schoos
Deputéierten

Fernand Kartheiser
Deputéierten



**Äntwert vun der Justizministesch, Elisabeth MARGUE op d'parlamentaresch Fro n° 237
vum 25. Januar 2024 vun den honorablen Députéierten Madame Alexandra SCHOOS a
Monsieur Fernand KARTHEISER**

Ad Fro 1:

Nom Akraafttriede vum Gesetz vum 7. August 2023 iwwert d'ASBLen an d'Fondatiounen, den 23. September 2023, goufe vun offizieller Säit aus eng ganz Rei un Informatiouns- an Ënnerstützungsmaassnahmen zur Verfügung gestallt.

Fir d'éischt goufen am Kader vun enger grouss ugeluechter Informatiounscampagne un all d'ASBLen an d'Fondatiounen Flyere verschéckt, fir iwwert dat neit Gesetz ze informéieren.

Am Oktober 2023 gouf den Internetsite myasbl.lu lancéiert an och d'Medie sensibiliséiert, iwwert dësen Internetsite ze informéieren. Den Internetsite bitt detailléiert Informatiounen zu dëse Sujeten:

- Déi wichtegst Neierunge vum Gesetz gi presentéiert;
- Informatiounen iwwert d'Akraafttriede vum Gesetz an d'Iwwergangszäit vu 24 Méint;
- Een detailléierte "*Guide comptable de la petite association*" gëtt presentéiert fir spezifesch op Froe betreffend der Comptabilitéit ze äntweren;
- Demarchë beim *Registre de Commerce et des Sociétés* ("**RCS**") ginn erklärt;
- Informatiounen iwwert Homologatiounsprozedure vun den Statute vun ASBLen; an
- Informatiounen iwwert Bekämpfung vu Geldwäschen an Terrorismusfinanzéierung.

D'Internetsäit bitt och Äntwerten op heefeg gestallte Froen. All d'Informatiounen op myasbl.lu an déi heefegst gestallte Froen gi reegelméisseg à jour gesat. Fir e bessert Verständnis goufen och Erklärungsvidéoen zur Verfügung gestallt.

Zousätzlech huet de Justizministère, an Zesummenaarbecht mat verschiddenen anere Ministère, eng Rei Informatiouns-Webinaren organiséiert fir d'ASBLen vun de jeeweilige Secteuren:

- den 19.09.2023 mam Kulturministère;
- den 17.01.2024 mam Sportsministère;
- den 19.01.2024 mam Familljeministère; an
- den 24.01.2024 mam Aussen- a Kooperatiounsministère.

Den Inneministère an d'Direktioun vum Tourismus vum Wirtschaftsministère sinn och kontaktéiert gi fir e Webinaire mat den ASBLen vun hirem Secteur ze organiséieren.

D'ASBLen an d'Fondatiounen hunn hefir näischt misse bezuelen.

Ad Fro 2:

Fir dass déi interesséiert Leit jidderzäit Accès op déi wichteg Informatiounen hunn, sinn ausféierlech Erklärungen betreffend der Comptabilitéit online op den Internetsitte myasbl.lu a lbr.lu ze fannen. D' Websäit myasbl.lu bitt e.a. e spezifesch "Guide comptable de la petite association" un. Dëse Guide wäert och nach a weidere Sproochen disponibel gemaach ginn. Op lbr.lu ginn et ënnert der Säit vum "Registre de Commerce et des Sociétés" zousätzlech Erklärungsvideoen an e Guide zu de "Comptes annuels" fir d'ASBLen. Dernieft goufen a ginn déi opgezielte gratis Webinaire ofgehalen, wou och op déi nei Reegelen an der Comptabilitéit agaange gëtt.

Ad Fro 3:

D'ASBLen hunn haut schonns d'Méiglechkeet sech un déi virdu genannte Quellen ze riichte fir Hëllef an Informatiounen ze kréien:

- www.myasbl.lu;
- www.lbr.lu;

Dernieft bidden aktuell eng ganz Rei Akteuren aus verschiddenen ASBL-Sectoren an och Gemengen eegen Informatiounsveranstaltungen, Hëllef an Couren zum neie Gesetz un. Et gëtt deemno momentan eng grouss Unzuel un Hëllef- an Informatiounsméiglechkeete fir ASBLen, dofir ass d'Ariichte vun engem spezifeschem Help Desk zurzäit net virgesinn.

Ad Froe 4 a 5:

Pauschal zousätzlech Finanzhëllef virzegesinn, géif déi ënnerschiddlech Situatiounen vun den ASBLen par Rapport zur Ëmsetzung vum neie Gesetz net consideréieren, dofir besteet hei keng automatesch Méiglechkeet.

D'Zil vum neie Gesetz ass et fir méi Transparenz a Kloeerheet ze schafen, woubäi den administrativen Opwand besonnesch fir kleng ASBLen esou geréng ewéi méiglech gehale soll ginn. Am Beräich vun der Comptabilitéit gesäit den Artikel 18 (1) vum neie Gesetz dofir vir, dass all ASBL eng Comptabilitéit muss féieren, mä hir Verpflichtungen awer proportionell zu hirer Gréisst an hiren Aktivitéiten solle sinn. Esou mécht d'Gesetz eng Klassifizierung jee no Gréisst vun den ASBLen a leet dräi Krittere fest, dorënner de Seuil vun 100.000 Euro Aktiva.

Déi praktesch Ëmsetzung vum neie Gesetz gëtt vum Ministère begleet a suivéiert, mä d'Gesetz ass emol eréischt zënter September 2023 mat enger Iwwergangszäit vu 24 Méint a Kraaft. Dofir ass et haut definitiv ze fréi fir iwwer eng Erhéijung vu Seulen nozedenken. Eng Indexatioun vum Seuil gouf net virgesinn, wëll dat et den d'ASBLen erschwéiere géif, nozevollzéien wat fir ee Montant vum Seuil aktuell gëllt, zumools, wa méi Indexranchen a kuerzer Zäit applicabel sinn.

Lëtzebuerg, den 27. Februar 2024

D' Justizministesch

(s.) Elisabeth Margue